

發其陰謀不軌狀而瀟亦許王隱過奏上  
上嘉王潛銷荆楚大害功置王過不問奪瀟爵  
爲庶人王由是顯名正德元年薨子莊和王  
祐構嗣爵莊和子厚煥是爲恭裕王恭裕之  
子載圻嗣之圻字昇甫喜讀書博極經史爲  
人脫略不羈能折節下士藩王故不投人名  
刺接諸搢紳亦無賓主禮王獨易之 典制  
郡王女封縣主歲食祿六百石王自以已祿  
糜費國廩無所補甚柰何復令女子冗食乎  
故王四女不復乞封而以妻諸郡學弟子隆

慶六年嘗上書請自試効用又上應 詔正  
禮兩䟽䟽畱中弗報王貧而好客不以冕爵  
矜人日事詞賦晚更窮易譚理籀冠野服灌  
畦種藥以自娛人咸稱昇甫先生著大隱山  
人集十七卷又著茹蠟子三徑緒詞各一卷  
子翊鉅翊鑒翊鑒皆工詩兄弟常共處一樓  
譚藝不倦號花萼社

### 秀藩

秀懷王見澍

英廟第五子也成化六年之國汝寧宦豎以王